



DEBAGOIENeko MANKOMUNITATEA

DEBAGOIENeko KIROL ELKARTEEI JARDUERA FISIKOAREN ETA KIROLAREN ARLOAN PRESTAKUNTZA PROGRAMA ARAUTUAK ETA EZ- ARAUTUAK BURUTZEKO DIRULAGUNTZAK EMATEA ARAUTZEN DUEN ORDENANTZA

Toki-araubidearen oinarriak arautzen dituen apirilaren 2ko 7/1985 Legearen 25.2.l) artikulua kirola eta kirol-instalazioak sustatzea jasotzen du, udalerriek Estatuko eta autonomia-erkidegoetako legeriaren arabera gauzatu beharreko eskumen propioen artean.

Bestalde, Euskadiko Kirolaren ekainaren 11ko 14/1998 Legearen 6. artikulua, udal-eskumenak zehazten dituenak, g) atalean jasotzen du *“Lege honen, gainontzeko legezko xedapenen eta lege hau garatzeko arauen indarrez dagozkien eskumen eta egitekoak baliatzea, bai eta eskuordetzan eman dakizkiekeenak ere.”*

Azkenik, Mankomunitatearen Estatutuen 7. artikulua bere helburuen artean jasotzen du *“arlo desberdinetako udal ekintza zehatzen koordinazioa”*, eta bere garaian Kirol Ekintzen Koordinazio Zerbitzua sortu zen.

Esparru juridiko honetan, orain Mankomunitatea osatzen duten udalek kirol-elkarteei atxikitako langileen prestakuntza sustatzearen beharra planteatu dute, horretarako dirulaguntzak emanez.

1. artikulua.- Xedea. Diruz lagun daitezkeen jarduerak

Oinarri hauen xedea da Mankomunitatearen lurralde-eremuan egoitza duten kirol-elkarteei, jarduera fisikoaren eta kirolaren arloko prestakuntzarako, norgehiagokaraubidean, dirulaguntzak ematea arautzea. Zehazki, honako jarduera hauek lagunduko dira diruz:

A) Debagoieneko kirol-elkarteei atxikitako kirol-teknikariak, epaileak, komisarioak, arbitroak eta kronometratzaileak egindako prestakuntza arautua, dagozkion kirol-titulazioak edo -egiaztapenak lortu baditu edo prestakuntza-orduen % 80ra edo gehiagora bertaratu dela egiaztatzen bada.

B) Debagoieneko kirol-elkarteei atxikitako kirol-teknikariak, epaileak, komisarioak, arbitroak eta kronometratzaileak egindako arautu gabeko prestakuntza, dagozkion kirol-titulazioak edo -egiaztapenak lortu baditu edo prestakuntza-orduen % 80ra edo gehiagora bertaratu dela egiaztatzen bada.



DEBAGOIENeko MANKOMUNITATEA

A) eta B) ataletan egindako prestakuntzak lotura zuzena izan beharko du kirol-elkarteak sustatutako kirol-modalitatearekin (Eusko Jaurlaritzaren kirol-erakundeen erregistroan izendatutako modalitatearekin edo modalitateekin bat etorri beharko du).

2. artikulua.- Araudi aplikagarria

Oinarri hauek eta diru laguntzak ematerakoan indarrean dauden gainerako arauak arautuko dituzte diru laguntza hauek eta baita erakunde onuradunen eta erakunde emailearen arteko harreman juridikoa ere.

Oinarri hauek aurrekusi gabekoetarako honako hauek aplikatuko dira:

- 38/2003 Legea, azaroaren 17koa, Diru-laguntzen Lege Orokorra.
- Lege horren erregelamendua onartzen duen uztailaren 21eko 887/2006 Errege-Dekretua.

3. artikulua.- Onuradunak

Dirulaguntza hauen onuradun izan ahalko dira, baldin eta diru-laguntzei buruzko Lege Orokorren 13. artikuluan jasotako dirulaguntzak lortzeko debeku-kausarik ez badute, Mankomunitate honen lurralde-eremuan (Antzuola, Aretxabaleta, Arrasate, Bergara, Elgeta, Eskoriatza, Leintz-Gatzaga eta Oñati udalerriak) egoitza duten kirol-elkarteak baldin eta dagokion dirulaguntza deialdian ezarritako epean prestakuntza arautua edo ez-arautua amaitu duten kirol-teknikari, epaile, komisario, arbitro eta kronometratzaileak atxikita badituzte; beti ere dagozkien kirol-titulazioak edo -akreditazioak lortu badituzte edo prestakuntza-orduen % 80ra edo gehiagora bertaratu direla egiaztatzen badute.

4. artikulua.- Hizkuntza betebeharrak

Onuradunak Debagoieneko Mankomunitatearekin dituen ahozko zein idatzizko harremanak Debagoieneko Mankomunitatearen lan hizkuntzaren arabera izango dira, hau da, gutxienez euskaraz.

5. artikulua.- Beste dirulaguntza batzuekin bateragarritasuna

Dirulaguntza hauek Europar batasuna edo nazioarteko erakundeetatik nahiz estatuko administrazio zein erakunde publiko edo pribatuetako jatorria eta helburu bera duten beste dirulaguntza edo sarrerekin bateragarriak izango dira, beti ere, jasotako laguntza



DEBAGOIENeko MANKOMUNITATEA

guztiak gehi deialdi honetan emandako dirulaguntzak ez badute diruz lagundutako jardueraren kostea gainditzen.

6. artikulua.- Dirulaguntzak eskatzeko modua eta epea

Dirulaguntza hauek lortzea nahi duten erakundeek, Debagoieneko Mankomunitateko web orrian (www.debagoiena.eus) dagoen eredu normalizatuari egokitutako eskaera aurkeztu beharko dute. Eskaerak honela aurkeztu ahal izango dira:

- Elektronikoki.
- Mankomunitatean bertan (Nafarroa Etorbidea, 17.- Arrasate).
- Administrazio Publikoen Administrazio Prozedura Erkidearen urriaren 1eko 39/2015 Legearen 16.4 artikuluan aurreikusitako edozein bide erabiliz.

Kirol-elkarte bakoitzeko dirulaguntza eskaera bakarra aurkeztuko da, bertan egindako prestakuntza-jarduera guztiak jasoz.

Eskaerak aurkezteko epea Gipuzkoako Aldizkari Ofizialean argitaratutako deialdi bakoitzean finkatuko da.

Ondo betetako eskaera eredu normalizatuarekin batera, eskatzaileek ondorengo dokumentuak aurkeztu beharko dituzte:

1. Elkartearen eskritura edo eraketa-agiria, eta Eusko Jaurlaritzako Kirol Elkarteen eta Erakundeen Erregistroan inskribatuta dagoela egiaztatzen duen agiria.
2. Kirol Elkartearen ordezkariaren edo arduradunaren Nortasun Agiri Nazionalaren fotokopia eta haren ordezkariaren egiaztageria.
3. Identitate fiskalaren txartelaren kopia.
4. Banketxe edo aurrezki kutxa batek emandako agiria, ziurtatzeko bere izenean kontu korrante bat duela.
5. Gizarte Segurantzarekiko eta Foru Ogasunekiko ordainketak egunean dituela dioten ziurtagiriak.
6. Dirulaguntza eskaera honetako jarduerak finantzatzeko jasotako beste dirulaguntza edo sarreraren zenbatekoa adierazten duen zinpeko aitorpena.
7. Azaroaren 17ko 38/2003 Legeko 13. artikuluko 2. eta 3. ataletan aipatzen diren diru laguntzak jasotzeko debekuetatik batean ere ez egotearen zinpeko adierazpena.
8. Dirulaguntzaren eskaeraren xede den prestakuntza egin duen pertsona kirol-elkarteari atxikita dagoela egiaztatzea.



DEBAGOIENeko MANKOMUNITATEA

9. Pertsona bakoitzak (kirol-teknikariak, epaileak, komisarioak, arbitroak edo kronometratzaileak) egindako dirulaguntzaren eskaeraren xede den prestakuntza-jarduerarekin lotutako dokumentazioa:
- Dirulaguntzaren eskaeraren xede den prestakuntzaren deskribapena: programa, iraupena eta erabilitako hizkuntza.
 - Matrikularen ordainagiria.
 - Lortutako kirol-titulazioaren egiaztagiria edo prestakuntza-orduen % 80ko edo hortik gorako bertaratzearen egiaztagiria.
 - Bidaia-gastuen egiaztagiriak, hala badagokio.
 - Ostatu-gastuen eta dieten egiaztagiriak, hala badagokio.
10. Kirol-elkarteak indarrean daukan Euskararen Erabilera Plana, hala badagokio.

7. artikulua.- Akatsak zuzentzea eta dokumentazio osagarria

Eskabideak edo horrekin aurkeztu beharreko dokumentuek ez balute eskatutakoa beteko edo akatsik izanez gero edo osatugabeak badira, interesdunari gehieneko eta luzaezinezko hamar eguneko epea emango zaio atzemandako akatsak konpontzeko. Eta ohartaraziko zaio epea igarota horrelakorik egin ez badu, eskariari uko egin diola ulertuko dela.

Aurkeztutako eskaera egoki ebaluatu eta erabaki ahal izateko beharrezkotzat jotzen duen behar beste dokumentu eta informazio osagarri eskatu ahal izango die Mankomunitateak eskatzaileei.

8. artikulua.- Diru-laguntzen zenbatekoa eta emateko prozedura

Urteko deialdian ezarriko da diru-laguntzetarako aurrekontu-kreditua dagokion ekitaldian.

Dirulaguntzak emateko prozedura norgehiagoka izango da, deialdi eta hautaketa-prozedura bakarraren bidez.

Prozedura erakunde interesdunak eskatuta hasiko da.

Deialdian eskatutako baldintzak betetzen dituzten eskabide guztiak lagunduko dira diruz, honela:

- Lehenik eta behin, matrikula-gastuak diruz lagunduko dira, kostuaren % 75eraino. Ehuneko hau handiagoa izango da ondorengo kasuetan:
 - Ikasketak euskaraz eginez gero %5eko gehigarria izango du.
 - Kirol elkarteak Euskararen erabilera plana indarrean izateak %5eko gehigarria izango du



DEBAGOIENeko MANKOMUNITATEA

- Prestakuntza egin duena emakumezkoa izateak %5eko gehigarria izango du.

Ehuneko gehigarri horiek metagarriak izango dira.

Matrikula-gastuengatik eman beharreko diru-laguntzen zenbateko osoa dagokion aurrekontu-partidan esleitutako gehieneko zenbatekoa baino handiagoa bada, Mankomunitateak eskabide guztien artean hainbanatuko du.

- Matrikula-gastuak diruz lagundu ondoren soberakina bada, bidaia-gastuak lagunduko dira diruz, kostuaren % 50eraino. Horretarako, bidaia-gastu hauek hartuko dira kontuan:
 - Ibilgailu partikularra erabiliz gero, kilometroko 0.29 euroko gastua hartuko da kontuan, gehi autobideko eta aparkalekuko gastuak. Kilometro-kopurua kalkulatzeko, erakunde eskatzailearen egoitza soziala hartuko da kontuan.
 - Alokaturako ibilgailua bada, alokairuaren, erregaiaren, autobidearen eta aparkalekuaren gastuak hartuko dira kontuan.
 - Hegazkina, trena, autobusa edo bestelako garraio publikoa erabiltzen bada, txartel arruntaren zenbatekoa hartuko da kontuan.

Bidaia-gastu horiengatik eman beharreko diru-laguntzen zenbateko osoak gaitzen badu matrikula-gastuen dirulaguntzaren ondoriozko soberakina, Mankomunitateak soberakin hori eskabide guztien artean hainbanatuko du.

- Eta, azkenik, bidaia-gastuak diruz lagundu ondoren soberakina bada, ostatu- eta dieta-gastuak lagunduko dira diruz, kostuaren % 50eraino. Horretarako, ostatu- eta dieta-gastu hauek hartuko dira kontuan:
 - Gastutzat gehienez berrogeita hamar (50) euro hartuko dira ostaturako, eta hogeita hamar (30) euro mantenu-dieta gisa, pertsona eta egun bakoitzeko. Diruz lagun daitezkeen egunak kalkulatzeko, prestakuntza-egunak gehi joateko eta itzultzeko egun bat hartuko dira kontuan.

Kirol-elkarte bakoitzari emandako dirulaguntza ezin izango da, inola ere, bere prestakuntza-jardueraren kostu osoaren % 50 baino handiagoa izan, ez eta 1.000 euro baino handiagoa ere.

Ikastaroak 10 ordu iraun beharko du, gutxienez, dirulaguntza jasotzeko.

Ostatu- eta dieta-gastuak Euskal Autonomia Erkidegotik kanpoko prestakuntzaren kasuan bakarrik lagunduko dira diruz, betiere Erkidegoan prestakuntza hori ematen ez bada.



DEBAGOIENeko MANKOMUNITATEA

9. artikulua.- Prozedura agintzeko, instrukzioa egiteko eta ebazteko organo eskudunak.

Diru-laguntzen deialdia egitea Debagoieneko Mankomunitateko lehendakariari dagokio, eta berak hartutako erabakia Gipuzkoako Aldizkari Ofizialean argitaratuko da.

Dirulaguntzak emateko prozedura garatzea Debagoieneko kontu-hartzaileari dagokio, eta berorrek erabaki proposamena egiteko datuak zehazteko, horiek ezagutzeko eta egiaztatzeko egoki iritzitako behar besteko jarduketak egingo ditu ofizioz.

Eskaerak aurkezteko epea bukatu ondoren, kontu-hartzaileak, udal kirol teknikarien aholkularitzarekin, eskatzaileak onuradun izateko ezarritako baldintzak betetzen dituela baieztatuko du eta aurkeztutako dokumentazioa osoa eta zuzena dela.

Kontu-hartzaileak eskaerei buruzko balorazio txostena egingo du.

Eskaerak ebaluatuta, prozedura erabakitzeko proposamena Kirol Batzorde Informatiboak egingo du eta Debagoieneko Mankomunitateko Gobernu Juntara eramango du, bera baita erabakia hartzeko organo eskuduna.

10. artikulua.- Dirulaguntza emateko erabakia

Oinarri hauetan aurreikusitako dirulaguntzak erabakitzeko organo eskuduna Debagoieneko Mankomunitateko Gobernu Junta izango da.

Dagokion erabakiak hartu eta horiek argitaratu edo jakinarazteko gehieneko epea bi hilabetekoa izango da eta eskaerak aurkezteko epea bukatzen denetik hasiko da kontatzen.

Aipatutako epe muga igarota erabakia jakinarazi ez bazaio edo argitaratu ez bada, legitimatuko du eskatzailea administrazio isiltasunez ezetsi dela ulertzeko.

Prozeduraren erabakia interesdunei jakinaraziko zaie, Administrazio Publikoko Ohiko Prozedura Administratiboaren urriko 1eko 39/2015 Legeko 40. artikuluan ezarritakoaren arabera.

11. artikulua.- Diru laguntzak ordaintzea.

Dirulaguntza emateko ordainketa bakarra egingo da, gastua egin dela eta betebeharrak bete direla egiaztatutakoan eta dagokion organoak horrela agindutakoan.



DEBAGOIENeko MANKOMUNITATEA

12. artikulua.- Diru laguntzak itzultzea.

Onuradunak oinarri orokor hauetan eta aplikagarri den gainerako araudian ezarritako edozein eskakizun edo betebeharrak ez betetzeak diru laguntza jasotzeko eskubidea erabat edo partzialki galdutzat jotzeko aitorpena ekarriko du, eta baita diru laguntza osorik edo partzialki dagozkion berandutze interesekin batera, itzultzeko betebeharra ere.

Ez betetze horiek mailakatzeko proportzionaltasun irizpideak erabiliko dira, diruz lagundutako jarduera guztietatik egindakoaren eta jasotako diruaren arabera kalkulatu direnak.

13. artikulua.- Oinarriak interpretatzea

Oinarri hauek interpretatzerakoan aplikatzerakoan edo horien ondorioetarako zalantzarik izanez gero, Debagoieneko Mankomunitateko Gobernu Juntak erabakiko du, Kirol Batzordeak aurrez txostena eginda hala badagokio.

14. artikulua.- Garapena eta exekuzioa

Oinarri hauek exekutatu ahal izateko behar beste erabaki hartzeko ahalmena ematen zaio Debagoieneko Mankomunitatearen lehendakariari.

15. artikulua.- Indarrean jartzea

Oinarri hauek Gipuzkoako Aldizkari Ofizialean argitaratzen diren egunaren biharamunean egongo dira indarrean.

EGINBIDEA.- 2021eko ekainaren 22an egindako bilkuran eman zion Mankomunitateko Gobernu Juntak Ordenantza honi hasierako onspena.

**Arrasaten, 2021eko uztailaren 5ean.
BEHIN BEHINEKO IDAZKARIA**